



Na osnovu člana 49. Zakona o carinskoj politici u Bosni i Hercegovini ("Službeni glasnik BiH", broj 58/15), člana 8. stav 1. Zakona o sistemu indirektnog oporezivanja u Bosni i Hercegovini ("Službeni glasnik BiH", br. 44/03, 52/04, 34/07, 4/08, 49/09, 32/13 i 91/17), člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav (2) Zakona o upravi ("Službeni glasnik BiH", br. 32/02, 102/09 i 72/17), direktor Uprave za indirektno oporezivanje donosi

O D L U K U

O POSEBNIM SLUČAJEVIMA U KOJIMA SE NE PODNOSI PROVOZNA CARINSKA DEKLARACIJA

Član 1. (Predmet)

Ovom odlukom određuju se posebni slučajevi u kojima se ne podnosi carinska deklaracija za postupak provoza uz upotrebu novog kompjuteriziranog provoznog sistema (NCTS) (u daljnjem tekstu: provozna deklaracija).

Član 2. (Slučajevi kada se ne podnosi provozna deklaracija)

- (1) Provozna deklaracija ne podnosi se u slučaju kada se roba koja ulazi u carinsko područje Bosne i Hercegovine (u daljnjem tekstu: carinsko područje), po zahtjevu deklaranta, prijavljuje za odgovarajuće carinsko odobreno postupanje ili upotrebu kod carinske ispostave koja mjere carinskog nadzora obavlja na carinskom terminalu koji za tu namjenu koristi i carinski referat na graničnom prijelazu preko kojeg roba ulazi u carinsko područje ili kod carinske ispostave koja se nalazi pored ili u neposrednoj blizini navedenog graničnog prijelaza.
- (2) Stav (1) ovog člana primjenjuje se na sljedećim graničnim prijelazima:
 - a) granični prijelaz Izačić - Carinska ispostava Bihać,
 - b) granični prijelaz Gradiška - Carinska ispostava Gradiška,
 - c) granični prijelaz Donji Svilaj - Carinska ispostava Donji Svilaj,
 - d) granični prijelaz Šamac - Carinska ispostava Šamac,
 - e) granični prijelaz Brod - Carinska ispostava Brod,
 - f) granični prijelaz Brčko - Carinska ispostava Brčko,
 - g) granični prijelaz Orašje - Carinska ispostava Orašje,
 - h) granični prijelaz Karakaj - Carinska ispostava Zvornik,
 - i) granični prijelaz Bratunac (Novi most) - Carinska ispostava Bratunac,
 - j) granični prijelaz Bijača - Carinska ispostava Ljubuški.

Član 3. (Postupanje u vezi robe koja ulazi u carinsko područje preko graničnog prijelaza Rača)

- (1) Osim ako to deklarant želi, podnošenje provozne deklaracije ne zahtijeva se kada se roba koja ulazi u carinsko područje preko graničnog prijelaza Rača, po zahtjevu deklaranta, prijavljuje za odgovarajuće carinsko odobreno postupanje ili upotrebu Carinskoj ispostavi Bijeljina u sljedećim slučajevima:
 - a) za robu bez obzira na njeno odredište u Bosni i Hercegovini, pod uvjetom da za istu nema ograničenja odnosno ničim nije isključena nadležnost Carinske ispostave Bijeljina,

- b) za zbirnu pošiljku iz stava (3) ovog člana.
- (2) Stav (1) ovog člana ne primjenjuje se za robu koja ulazi u carinsko područje preko graničnog prijelaza Rača, a nije u pitanju zbirna pošiljka iz stava (3) ovog člana, u sljedećim slučajevima:
- ako je za predmetnu robu nadležna druga carinska ispostava (bilo da je ta nadležnost propisana, na primjer, slučaj kod određenih carinskih povlastica ili drugo, ili je nadležnost određena carinskim odobrenjem koje se odnosi na predmetnu robu, dozvolom za uvoz ili drugo),
 - ako je u pitanju roba koja će se prijaviti za odgovarajući uvozni carinski postupak po kućnom uvoznom carinjenju u skladu sa važećim carinskim odobrenjem, neovisno da li je tim odobrenjem i/ili odobrenjem za status ovlaštenog primaoca, kao nadzorna carinska ispostava, određena Carinska ispostava Bijeljina ili neka druga carinska ispostava.
- (3) U slučaju kada predmetna zbirna pošiljka, pored robe iz stava (1) tačka a) ovog člana sadrži i robu iz stava (2) ovog člana postupanje je sljedeće:
- roba iz stava (2) ovog člana mora biti prijavljena Carinskoj ispostavi Bijeljina za postupak provoza po proizvodnoj deklaraciji, radi njenog upućivanja u nadležnu odredišnu carinsku ispostavu,
 - ako je za robu iz stava (2) tačka b) ovog člana, po odobrenju za kućno uvozno carinjenje i/ili za status ovlaštenog primaoca, kao nadzorna carinska ispostava, određena Carinska ispostava Bijeljina, u tom slučaju za istu se ne može koristiti kućno uvozno carinjenje niti status ovlaštenog primaoca, nego redovan postupak.
- (4) U slučajevima iz stava (1) ovog člana, Carinski referat na graničnom prijelazu Rača, radi identifikacije robe, stavlja carinske plombe, gdje je to moguće u skladu sa carinskim propisima.
- (5) Roba iz stava (2) ovog člana koja se unosi u carinsko područje preko graničnog prijelaza Rača mora se prijaviti za postupak provoza podnošenjem proвозne deklaracije carinskom referatu na tom graničnom prijelazu.
- (6) Carinski referat na graničnom prijelazu Rača i Carinska ispostava Bijeljina uredit će, u pisanoj formi, način na koji će se međusobno obavještavati o upućivanju robe i njenom predočenju, odnosno prijavljivanju Carinskoj ispostavi Bijeljina, način razduživanja iste i drugo od uticaja na primjenu ove odluke.

Član 4.

(Dokumenta koja se prilažu uz carinsku deklaraciju)

Uz carinsku deklaraciju po kojoj se roba iz čl. 2. i 3. ove odluke prijavljuje kod carinske ispostave za odgovarajuće carinski odobreno postupanje ili upotrebu moraju biti priložena sva dokumenta koja su potrebna kako pri ulasku robe u carinsko područje (na primjer, odgovarajuće dozvole i dokumenta u vezi inspekcijskih kontrola, ovisno o kojoj robi je riječ, to jest da li predmetna roba, pri ulasku u carinsko područje, podliježe dozvoli kao mjeri trgovinske politike za ulazak robe u carinsko područje ili nekoj od inspekcijskih kontrola), tako i za carinski odobreno postupanje ili upotrebu za koje je roba prijavljena carinskoj ispostavi.

Član 5.

(Međusobna carinska suradnja i vođenje evidencije)

- U primjeni ove odluke, carinski referat preko kojeg roba ulazi u carinsko područje i odredišna carinska ispostava uredit će, u pisanoj formi, način na koji će carinski referat obavještavati carinsku ispostavu o prispjeću prijevoznog sredstva sa robom i pratećim dokumentima, načinu predaje iste i prestanku carinskog nadzora nad robom od strane carinskog referata.
- U primjeni ove odluke, carinski referati na graničnim prijelazima iz čl. 2. i 3. ove odluke, dužni su uspostaviti i voditi odgovarajuću evidenciju koja mora najmanje sadržavati sljedeće podatke: redni broj, datum i vrijeme ulaska robe na graničnom prijelazu, podatke o prijevoznom sredstvu (registarske oznake vučnog i priključnog vozila), trgovački naziv robe (ako je u pitanju više robe, može se upisati: "roba iz fakture") i bruto masu robe, broj i datum CMR-a i fakture, podatke o uvozniku/primaocu robe, podatke o špediciji koja predaje dokumenta gdje je primjenljivo, datum i vrijeme obavještavanja carinske

ispostave o prispjehu prijevoznog sredstva sa robom i pratećom dokumentacijom i podatke o carinskim službenicima carinskog referata i carinske ispostave koji učestvuju u toj radnji i njihove potpise (podatke za službenike carinske ispostave i njihove potpise gdje je primjenljivo), podatke o broju (MRN) i datumu carinske deklaracije po kojoj je roba stavljena u odgovarajuće carinski odobreno postupanje ili upotrebu u carinskoj ispostavi.

- (3) Carinski referati na graničnom prijelazu i carinske ispostave iz čl. 2. i 3. ove odluke dužni su uspostaviti svu neophodnu međusobnu suradnju i komunikaciju koja će im omogućiti pravilno i efikasno postupanje u primjeni ove odluke i kontrolu tog postupanja.

Član 6.
(Izuzetak od primjene ove odluke)

Ova odluka ne primjenjuje se kada je u slučajevima iz čl. 2. i 3. ove odluke roba koja ulazi u carinsko područje drumsko motorno i priključno vozilo, u kom slučaju se podnosi provozna deklaracija.

Član 7.
(Prestanak važenja)

Stupanjem na snagu ove odluke prestaje važiti Odluka o posebnim slučajevima u kojima se ne podnosi provozna carinska prijava broj: 01-02-2-1223-1/20 od 07.05.2020, 01-02-2-1223-3/20 od 08.05.2020. i 01-02-2-694-1/22 od 03.03.2022. godine.

Član 8.
(Stupanje na snagu)

Ova odluka stupa na snagu danom početka rada Carinske ispostave Bratunac na lokaciji graničnog prijelaza Bratunac (Novi most) i objavljuje se na web stranici UIO: www.uino.gov.ba u dijelu pod nazivom "Propisi".

Broj: 01-02-2-1348- 3 /23
Banja Luka, 08.06. 2023. godine



DIREKTOR

[Handwritten signature]
Dr. MIRO DŽAKULA